

## Info-Module

Pod nazivom „Info-Module“ organiziraju se informacione manifestacije o temama koje Vam trebaju omogućiti bržu i bolju orijentaciju u Beču. Referenti govore Vaš maternji jezik ili neki od jezika po Vašem izboru. Na ovim manifestacijama imate priliku postavljati pitanja o svemu što Vas zanima.

Nakon završetka manifestacije dobićete pečat na jedan od vrijednosnih bonova za učenje njemačkog (Sprachgutscheine) koji se nalaze u Vašem “Obrazovnom pasošu” (Bildungspass). Za plaćanje dijela troškova kursa njemačkog jezika na nekom od certificiranih (priznatih) instituta možete iskoristiti samo vrijednosni bon sa pečatom.

**Molimo Vas da „Bečki obrazovni pasoš“ (Wiener Bildungspass) nosite sa sobom na svaku informativnu manifestaciju!**

Nemojte zaboraviti da na kraju manifestacije zatražite unos potvrde o posjećenom predavanju/savjetovanju u svoj “Obrazovni pasoš”!

Ako Vas zanima kada se održava slijedeća informativna manifestacija, nazovite 01/90 500 36 – 01 (njemački) ili 01/90 500 36 – 02 (bosanski). Termine možete pronaći i u Internetu pod: [www.startwien.at](http://www.startwien.at)

## Teme info-modula i savjetovanja

### StartWien – Zanimanje

Ako želite raditi u Austriji, preporučujemo Vam “Prvo savjetovanje o zapošljavanju” u waff-u (Bečki fond za podsticanje daljnjeg profesionalnog usavršavanja zaposlenih). Tamo ćete na maternjem jeziku dobiti informacije o pristupu radnom tržištu, kao i značajne daljnje informacije. Saradnici waff-a će zajedno s Vama sačiniti listu vaših kvalifikacija, dosadašnjih zaposlenja i djelatnosti, kao i Vaših želja u vezi s radnim mjestom u Austriji.

Dobićete poštom list s Vašim podacima u prijevodu na njemački koji kasnije trebate obavezno ponijeti na prvi termin u Zavodu za zapošljavanje (AMS-Arbeitsmarktservice). Taj list će biti od velike koristi kako Vama tako i Vašem savjetniku u AMS-u.

### StartWien – Priznavanje i nostrifikacija kvalifikacija

Pošto ste u svojoj domovini imali posao u određenoj struci, stekli stručno obrazovanje, završili školu ili fakultet, sada se želite obavijestiti o mogućnostima njihovog priznavanja.

U Savjetovalištu za priznavanje kvalifikacija i daljnje obrazovanje možete dobiti savjetovanje o priznavanju i nostrifikaciji Vaših kvalifikacija stečenih u inozemstvu, odnosno u domovini. Kako se radi o individualnom savjetovanju, molimo Vas da u „Anerkennungs- und Weiterbildungsberatungsstelle (Kompetenzzentrum)“ zakažete termin: 01 / 58 58 019. **Savjetovanje možete dobiti samo poslije zakazanog termina!**

### StartWien – Pravo boravka

U ovom modulu ćete dobiti informacije o svemu što Vas zanima iz te oblasti (kao npr. kako produžiti boravišnu dozvolu, koje su vrste dozvola itd.) i ostale informacije od značaja na putu do austrijskog državljanstva.

### StartWien – Zajednički život

U ovom modulu imate mogućnosti da s jednim zemljakom/zemljakinjom koji se i sam/a nekada ovamo doselio/la u opuštenoj atmosferi na svom maternjem jeziku razgovarate o svojim prvim iskustvima i opažanjima u gradu. Ovdje možete svoje utiske

o Beču i njegovim stanovnicima razmijeniti s drugima. Dobićete naravno i dragocjene informacije i korisne prijedloge koji će Vam pomoći u “savladavanju” svakodnevice u Beču. Modul treba doprinijeti tome da „novi“ život u ovom gradu započnete sa što manje stresa.

## StartWien – Zdravlje

U ovom modulu na maternjem jeziku dobijate odgovore na pitanja iz oblasti zdravstvene zaštite kakva su između ostalih i ova: Kada sam osiguran/a? Šta je E-Card? Koji ljekari u Beču govore moj jezik? Šta trebam raditi u slučaju trudnoće? Šta je «Pasoš za majku i dijete» (Mutter-Kind-Pass)? Koje su vakcine važne? Kome se trebam obratiti ako se razbolim tokom vikenda ili noću? Šta trebam uraditi ako mi se povrijedi dijete? Koje važne brojeve telefona dežurnih službi trebam znati? U kojim slučajevima se zove “Hitna pomoć”? Kada je bolje otići do ambulante ili u bolnicu? Za koje medicinske usluge moram platiti lični udio iako sam osiguran/a? Koje sve ponude postoje u gradu kada je riječ o zdravstvenim uslugama?

## StartWien – Obrazovanje

Modul Vam nudi važne informacije o obrazovanju Vašeg djeteta i odgovore na dolje navedena i slična pitanja: Gdje mogu zbrinuti dijete mlađe od tri godine ako moram raditi? Od kada moje dijete može ići u vrtić? Kakvi vrtići postoje u Beču? Gdje mogu prijaviti dijete za vrtić? Koliko moram platiti za vrtić? Šta je predškola? Od kada u Austriji postoji školska obaveza i koliko godina ona traje? Kako funkcionira upisivanje u škole? Dijete mi je u školskoj dobi i u Beč je došlo tokom školske godine: Šta trebam učiniti? Koje mogućnosti podsticanja postoje za moje dijete kako bi bolje naučilo njemački? Što bih trebao/ trebala uopćeno znati o funkcioniranju škola u Beču? Koji tipovi škola postoje? Koje finansijske potpore postoje za djecu u vrtiću i u školi?

Gdje se mogu raspitati još iscrpnije o određenim pitanjima iz ove oblasti? Kakve ponude za roditelje školske djece postoje u Beču?

## StartWien – Stanovanje

U ovom modulu ćete na maternjem jeziku dobiti brojne informacije u vezi sa stanovanjem, kao što su:

Na šta moram paziti prilikom traženja stana? Gdje mogu tražiti stan? Koje vrste stanova postoje (Miete/privatni stanovi za iznajmljivanje, Genossenschaft/stambene zadruge, Eigentum/vlasništvo)? Šta se podrazumijeva pod kategorijom stana? Koje vrste ugovora o stanovanju postoje? Od kojih se elemenata sastoji stanarina, šta su troškovi održavanja? Za šta je nadležna Uprava zgrade (Hausverwaltung)? Kada joj se trebam obratiti? Šta znači „kaucija“ “Ablöse”, maklerska provizija/ Maklergebühr? U kojim slučajevima može doći do raskidanja ugovora o iznajmljivanju stana? Šta piše u “Kućnom redu”? Kako se pravilno razvrstava smeće? Kome se mogu obratiti, ako imam pitanja u vezi sa stambenim odnosima?

## StartWien – Učenje njemačkog

U ovom modulu se možete obavijestiti o kursevima i načinu učenja njemačkog. Iako svako ima mogućnosti sporazumijevanja i na drugim jezicima, ipak je važno razumjeti i govoriti njemački. Na kursevima jezik učite zajedno s drugim odraslim osobama. Učesnici kursa se mogu uzajamno motivirati, upoređivati iskustva i ponekad se ispomagati zajedničkim maternjim jezikom. Učenje i vježbanje je, međutim, moguće i poželjno i pored kursa. **Ali kako?**

Kako trebam učiti da bih imao/imala najveći učinak? Ko mi može pomoći? Kako mi može poći za rukom da mi uz sve obveze ostane i vremena za učenje? Gdje mogu neometano raditi? Gdje mogu upoznati druge ljude? Kako se snalaze drugi ljudi koji su kao i ja novi u Austriji?

U ovom modulu pokušava se odgovoriti na gore navedena, ali i na Vaša lična pitanja o temama jezik, kurs njemačkog i ispit za ispunjavanje Integracionog sporazuma.